



Aningaasaqarnermut Naalakkersuisoq

TUAVIORTOQ

Ataasinngornermi ulloq 13. december 2010 Aningaasaqarnermut Ataatsimiititaliap aalajangernerera pillugu Naalakkersuisunut ilisimatitsissut – Suliaq nr. 01.31.06/10-00516

Qaasuitsup Kommuniani aqutsiveqarfinni Upernavimmi aamma Uummannami qassutinik annaasimasaniq qalluinikkut saliisitsineq.

Naalakkersuisut **inassutigaa**,

- kontumi pingaarnermi 50.01.01 Aalisarnermut Piniarnermut Nunalerinermullu Naalakkersuisoqarfik, allaffissornerq-imi aningaasaliissutit 500.000 kr.-inik qaffanneqassasut.
- konto pingaarneq 20.12.12 Aningaaseriveqartitsineq assinganik 500.000 kr.-inik appartinneqassasoq.

Aningaasaqarnermut Ataatsimiititaliap oqaaseqaatai

Naalakkersuisut suliassami matumani aqutsiveqarfinni Upernavimmi Uummannamilu qassutaarsiutinik qalluinissamut 500.000 kr.-inik qinnuteqarput. Aningaasaliissutit qinnutigineqarput Qaasuitsup Kommunianik, siunertamut tassunga aamma 200.000 aningaasaliissuteqartussamik, isumaqatigiissuteqarsimaneq tunngavigalugu.

Aningaasaliissutit qinnutigineqartut pisassanik qaffaanermit taarsiutitut isigineqassapput, aqutsiveqarfinnummi pineqartunut qaleralittassiissutit nungunneqareemata.

Aningaasaqarnermut Ataatsimiititaliaq tunngaviummik isumaqarpoq pitsaasuulluni naapertuuttusoq taamatut qassutaarsiutit qallorneqartarpata. Qassutit qimaannakkat aalisagaqassutsimik ulorianartorsiortitsisinnaapput, taamaattumillu pissusissamisoorluni tamatumani siunnerfilimmik iliuuseqartoqartarpat.

Ataatsimiititaliap ilisimaaraa aalisartorpasutit qassutaarsiutitik piniutaarsiutitillu nalunaarutigineq ajoraat. Naalakkersuisut qularnaarniartariaqarpaat qassutaarsiutit piniutaarsiutillu aalajangersimasumik periaaseqarluni nalunaarutigineqartalernissaat.

Ataatsimiititaliaq isumaqarpoq aalisartut namminneq pisussaaffigisariaqaraluaat - aningaasaqarniarnerlu eqqarsaatigalugu nammineq soqutigisariaqarlugu – *namminneq* qassutaarsiutitik qallussallugit Nunatta Karsianit akilerneqanngitsumik, qassutaarsiutimmi ilisimaneqartutut aalisagaqassutsimut ajoqutaammata. Taamatut qassutaarsiutinik qalluinissamut pisortanit tapiissuteqaqqinnikkut Naalakkersuisut siunissaq eqqarsaatigalugu aalisartut akornanni neriulluarnermik pilersitsisinnaapput siunissami aamma qassutaarsiutinik qalluinissamut pisortat tapiissuteqaqqikkumaartut, taamaaliornikkullu inuussutissarsiortut namminneq piumassutsiminnik qalluerujussuseqarnerat annikillisinneqarluniluunniit

peerutivissinnaalluni. Taamaaliortuarnikkut taamaalilluni iliuuseqarusussuseqannginneq pilersinneqassaaq aalisarnermik inuussutissarsiuteqarnermut ajoqutaasinnaasoq.

Taamaattumik Aningaasaqarnermut Ataatsimiititaliaq isumaqarpoq Naalakkersuisut siunissamut isigalutik qassutaarsiutinik piniutaarsiutinillu ingerlaavartumik qalluisarnissaq qularnaarniarlugu suliniutaasinnaasunik allanik isumaliuteqartariaqartut. Assersuutigalugu takorloorneqarsinnaavoq aqutsiveqarfimmi ataasiakkaani pisassinneqarneq qassutaarsiutinik nalunaaruteqartarnissamik qalluisarnissamillu pisussaaffimmik ilaqartinneqartariaqartoq, taamaalillunilu pisassiissutit ilaat aatsaat aalisarneqarsinnaasassallutik qassutaarsiutit qallorneqareerpata. Periarfissatut allatit takorloorneqarsinnaavoq qassutaarsiutini pisatut naatsorsorneqartut pisasiissutinit tamanit ilanngaatineqartalernissaat.

Ataatsimiititaliap ilanngullugu annertuumik isornartoqartippaa isummernissamut tunngavissiami oqaatigineqarmat kommune aningaasaqarnikkut ajornartorsiuteqalissasoq aalisartut pisortanit ikiorsiissuteqarnissaq pissutigalugu isummernissamut tunngavissiaq manna akuerineqassanngikkaluarpat. Taamaattumik matumani erseqqissarneqartariaqarpoq kommune inatsisit naapertorlugit pisussaaffeqarmat innuttaasut kikkuugaluartulluunniit, aalisartut ilanngullugit, inuttut atugarisat pissutigalugit ikiortariaqalersut ikiornissaannut. Namminersorlutik Oqartussat pisussaaffiginngilaat – pisussaaffigisinnaanagulu – kommunini isumaginninnermut aningaasartuutit killilersimaarneqarnissaat kisiat siunertarlugu kommunini ingerlatanut assigiinngitsunut tapiissuteqartarnissaq. Ajornartorsiutit taamaattut Aningaasaqarnermut Ataatsimiititaliaq aqutigalugu ingerlaavartumik ilassutitut aningaasaliissuteqartarnikkut suliarineqartarsinnaanngillat, kommuninulli ataatsimoortumik tapiissutit pillugit naalakkersuinikkut isumaqatigiinniartarnerit aqutigalugit suliarineqartariaqarlutik. Taamaattumik tunngaviusumik isigalugu qinnuteqaat manna kommunimut ataatsimoortumik tapiissutinik toqqaannanngitsumik annikitsumik tapiinertut isigineqarsinnaaneruvoq aalisartunut aningaasaqarniarnikkut ikiorsiinertut pinnani.

Aningaasaqarnermut Ataatsimiititaliap aalajangernera

Qulaani taaneqartutut paasinnilluni Aningaasaqarnermut Ataatsimiititaliap Naalakkersuisut inassuteqaataat **akuerai**.

Aningaasaqarnermut Ataatsimiititaliaq sinnerlugu

Naaja Nathanielsen
Aningaasaqarnermut Ataatsimiititaliap siulittaasuat